



(khas bagi Majalah Qalam - tidak dibenarkan dikutip)

Peringatan: Pertanyaan-pertanyaan yang tidak disertakan tanda tangan dan alamatnya yang terang tidak diraikan. Juga pertanyaan-pertanyaan yang mengenai di sekeliling hal ehwal masyarakat kita itulah yang di utamakan daripada soal yang sulit-sulit dan jarang berlaku oleh kerana ruangan ini adalah berguna juga untuk panduan pembaca-pembaca.

### Berkahwin dengan Sharifah

‘Uthmān Bin Ḥussein Singapura bertanya: Adakah nas dalam Quran dan hadis yang melarang seorang Sharifah bersuamikan seorang muslim yang bukan Sayyid?

Jawab: Tidak ada nas syarak, baik di dalam Quran atau hadis yang melarang perkahwinan Sharifah dengan orang yang bukan Sayyid bahkan Al-Quran dan hadis telah menerangkan dengan tegas bahawa manusia itu adalah taraf dalam nasab keturunan- tidak ada kelebihan Sayyid di atas orang yang bukan Sayyid, dan tidak ada kelebihan arab di atas ajam melainkan dengan taqwa.

Nas al-Quran al-Karim yang tegas dan jelas dalam soal “kufu” ini adalah terkandung di dalam firman Allah Ta‘ālā:  
*Yā ayyuhānnasu innā khalaqnā kum min dhakarin wa unthā wa ‘alnākum sh‘ubān wa qabā’ila lita ‘ārafū inna akramakum ‘indallāhi atqākum innallāha ‘alīmun khabīr.* 13, al-Ḥujurāt.

Ertinya: “Hai sekalian manusia! Sesungguhnya kami telah jadikan kamu daripada lelaki dan perempuan; dan kami jadikan kamu beberapa bangsa dan suku, supaya kamu berkenal-kenalan. Sesungguhnya yang terlebih mulia dari antara kamu di sisi Allah ialah orang yang taqwa; Sesungguhnya Allah Amat Mengetahui dan Amat Halus Pengetahuan-Nya”.

Di dalam hadis Nabi (SAW) pula diterangkan:

“ ‘An Abī Khātim al-Maznī, qāla Rasulullāhi (SAW):  
*Idhā atākum min tarḍuwna dīnihi wa khalqihī fānkīhū illa taf‘alūhi takun fitnatun fīl arḍī wa fasādin kabīr, qālū,*

*yā Rasulullāh wain kāna fīh: Idhā jā’ukum min tarḍūn dīnahu wakhalqahu fa ‘nkahūh thalātha marata-* R. al-Tirmidhī

Ertinya: “Rasulullah (SAW) telah bersabda: Apabila datang kepada kamu seorang (peminang) yang kamu sukai agamanya dan perangainya, maka kahwinilah dia, jika tidak kamu kerjakan yang demikian itu, nescaya akan terjadi fitnah di muka bumi dan kerosakan yang besar”. Mereka berkata: “Ya Rasulullah walaupun keadaan dia itu?” Lalu dijawab oleh baginda: Apabila datang kepada kamu seseorang (peminang) yang kamu sukai agamanya dan perangainya, maka kahwinilah dia”. Diulangnya sabdanya itu tiga kali.

Jika kita menyiasat dalam tawarikh Islam nescaya kita kan dapati dasar ini telah diamalkan dalam masa hayat Rasulullah (SAW). Misalnya Zaynab sepupu Nabi telah dikahwinkan oleh Nabi dengan Zayd (bekas hamba).

Lebih lanjut soal kufu ini telah dikupas oleh Sayyid Rashīd Riḍā di dalam “*al-Manār*”: Katanya antara lain-lain:

“Kesimpulannya, bahawa syariat Islam ialah syariat yang berdasarkan keadilan dan persamaan, bukannya syariat yang membahagi-bahagikan (umat Islam kepada beberapa tingkatan) atau bermuka-muka (kepada sesuatu golongan yang tertentu) sedang hukum-hukumnya adalah am, dan tujuan ibadat di dalamnya ialah membersihkan jiwa dan mengasihinya dengan sifat-sifat yang terpuji; manakala tujuan muamalatnya pula ialah bagi menolak kerosakan dan membawa faedah serta memelihara maslahah; dengan asas ini maka seseorang itu tiada berhak menentukan kaum

Sayyid atau lainnya dengan hukum-hukum syarak yang dijadikan sebagai perkara ibadah. Keturunan Hassan dan Ḥussīn adalah sama taraf mereka dengan orang lain dalam hukum syarak.

Adapun (hadis) yang telah warid pada menentukan keluarga Nabi (SAW) dengan setengah-setengah hukum seperti diharamkan mereka menerima zakat, itu adalah maakul tujuannya, tiada boleh seseorang pun menambahnya, kerana ketentuan (*al-Takhṣīṣ*) adalah berlainan daripada qiyas, maka tiada boleh diqiyaskan atasnya di dalam hadis sohih: Bahawa keluarga Nabi yang diharamkan mereka menerima zakat ialah Bani Hāshim dan Bani al-Muṭallib bukan terkhas kepada keturunan Fāṭimah sahaja; dan bahawa kufu di dalam nikah tiada boleh diambil dalil membolehkan dengan “*fada’ il*” (kelebihan darjat) dan (*al-Khaṣā’iṣ*) (keistimewaan-keistimewaan) tetapi soal kufu itu hendaklah ditentukan dengan nas syarak: Maka tidak ada suatu pun nas yang sahih di dalam soal kufu ini. Al-Ḥāfiẓ Ibn Ḥajar al-‘Asqalānī di dalam syarah Bukhārī berkata: *Lam yathibtu fi i’tibār al-kafā’; fī al-nisab ḥadīth.*” Ertinya: “Tiada sabit suatu hadis pun yang mengakui kufu itu di dalam nasab keturunan.” Berkennaan qiyas pula, Sayyid Ridā berkata: “Alim ulama ahli fekah yang mengatakan kufu itu pada ansab keturunan, maka hujahnya (alasannya) yang sahih ialah qiyas yang tujuannya menolak malu, tetapi kalau perkara itu tiada mendatangkan malu, (yakni tidak menjadi landasan umpat caci masyarakat) maka kufu di dalam nasab keturunan itu tidak ada harganya (gugur)....”

\* \* \*

### Perintah Yang Wajib Ditaati

Aḥmad ‘Abdul Ghānī, Rembau, Negeri Sembilan bertanya:

Perintah cara manakah yang wajib ditaati mengikut ajaran al-Quran?

Jawab: Perintah-perintah yang wajib ditaati ialah perintah-perintah yang diturunkan oleh Allah dan disampaikan oleh Rasul-Nya dan

keputusan-keputusan yang diambil daripada permesyuaratan yang berkebajikan di antara pemerintah-pemerintah untuk kebajikan bersama. Tuhan telah berfirman (maksudnya): “Hai orang-orang yang beriman! Taatlah kamu kepada Allah dan taatlah kamu kepada Rasul dan ulul amri (orang-orang yang berkuasa) dari di antara kamu” (Q al-Nisā’ ayat 59)

*Ūlī al-Amr* (orang-orang yang berkuasa) yang dimaksudkan di dalam Islam ialah pemerintah yang dipilih untuk menunaikan kewajipannya menyelenggarakan umat dengan adil dan saksama dan bersedia menerima segala teguran dan fikiran sekalipun di tengah-tengah ramai. Tiap-tiap pemerintah yang menjalankan pekerjaan itu hendaklah ia bermesyuarat di dalam jemaahnya - bukan menurut kemahuannya mereka sendiri. Allah berfirman (maksudnya): Bermesyuaratlah kamu kepada kebajikan dan apabila telah kamu berazam dengannya maka bertawakallah kamu kepada Allah (untuk menjalankannya).

Dasar bermesyuarat itu adalah suatu dasar yang disuruh dan diperintahkan supaya dibuat oleh pemeluk-pemeluk Islam sekiranya perintah-perintah itu telah dimesyuaratkan dengan diketahui akan manfaat dan mudaratnya maka perintah yang sedemikian itu adalah patut ditaati. Tetapi kalau perintah-perintah itu datangnya daripada seseorang dengan tidak dimesyuaratkan dan menuntut supaya mesti ditaati maka yang demikian itu, jika terbitnya daripada pemerintah sudah tentu caranya disebut cara diktator, sedang Islam adalah ditaja dengan cara bermesyuarat.

\* \* \*

### Harap Perhati

Dalam jawapan Abu al-Mokhtar yang lalu telah tertinggal sebris berkenaan riwayat Muḥammad Bin ‘Abdul Wahāb, yang betulnya seperti di bawah ini:

Muhammad Bin ‘Abdul Wahāb ialah seorang ulama yang berpengaruh yang telah mendapat sokongan besar daripada ‘Abdul Rahman Bin Sa‘ūd moyang Raja Sa‘ūd yang ada sekarang ini.